



Iesus montre comme il se faut contenir avec ses prochains, & supporter leur infirmité.

NOSTRE Sauueur Iesus-Christ nous voulant montrer qu'il nous faut recevoir plustost nouvelle injure, que se venger de celle qu'on nous fait, dist, Vous avez ouïy qu'il a esté dit, Oeil pour oeil, dent pour dent. Mais moy ie vous dy, Ne résistes point au mal ; ains si aucun te donne en la iouë dextre, presse luy l'autre : & à celuy qui veut plaider pour auoir ton saye, laisse luy le manteau. Donne à celuy qui te demande, & ne te destourne de celuy qui veut emprunter de toy. Vous avez ouïy qu'il a esté dit, Tu aimeras ton prochain, & tu hayras ton ennemy. Mais moy ie vous dy, Aimez vos ennemis, & benissez ceux qui vous persecutent, afin que soyez enfans de vostre Pere qui est és Cieux ; car il fait luire son Soleil sur les bons & sur les mauuais, sur les iustes & sur les iniustes ; car si vous aimez seulement ceux qui vous aiment, quel salaire en aurez-vous ? les Peagers ne font-ils pas de mesme ? Soyez donc parfaits comme vostre Pere, qui est és Cieux, est parfait. Pareillement Iesus exhorte de ne faire les oeuvres de Iustice deuant les hommes : car ainsi faisant ils reçoivent leur loyer. Plus il dit, Quand vous prierez, ne ressemblez point ceux qui estiment estre exaucez par beaucoup de paroles ; car vostre Pere connoist ce qui vous est besoin. Priez donc ainsi : Nostre Pere qui est és Cieux.